



Bosnia and Herzegovina  
Federation of Bosnia and Herzegovina  
**CANTON SARAJEVO**  
Ministry of Labour, Social Policy,  
Displaced Persons and Refugees

Bosna i Hercegovina  
Federacija Bosne i Hercegovine  
**PARLAMENT FEDERACIJE**  
SARAJEVO

Broj: 13-03/1-04-53745-1/26  
Sarajevo, 19.01.2026. godine

Primljeno: 22-01-2026			
Org. jed.	Broj	Priloga	Vrijednost
05/1	-02-	666	/25

**PARLAMENT FEDERACIJE**  
**PREDSTAVNIČKI/ZASTUPNIČKI DOM**  
**ul. Hamdije Kreševljakovića broj 3**  
**71000 Sarajevo**  
zastupnica u Predstavničkom domu  
**Parlamenta Federacije BiH Alma Kratina**

U Ministarstvu za rad, socijalnu politiku, raseljena lica i izbjeglice Kantona Sarajevo zaprimljeno je slijedeće pitanje zastupnice u Predstavničkom domu Parlamenta Federacije BiH, Alme Kratina:

**U kojoj fazi je izmjena i dopuna Zakona o inspeksijskim poslovima Federacije BiH i konačno uspostava inspektorata za dječiju i socijalnu zaštitu?**

**Kako je već odavno uočena manjkavost sistema u podršci djeci žrtvama nasilja i trgovine ljudima da li se u Vladi razmatra mogućnost osnivanja specijalizovane sigurne kuće za djecu žrtve nasilja i trgovine ljudima?**

**Šta je Vlada Federacije konkretno učinila ili namjerava učiniti, kroz saradnju sa kantonalnim vladama, obzirom na ustavnu nadležnost, na osiguranju smještajnih kapaciteta i programa podrške za djecu žrtve krivičnih djela koja imaju poremećaje u ponašanju?**

**U kojoj mjeri su na kantonalnoj razini osigurani smještajni kapaciteti i podrška djeci žrtvama krivičnih djela koja imaju poremećaje u ponašanju obzirom da nema specijalizovanih ustanova za ovu kategoriju koja treba kontinuiranu podršku u nizu drugih usluga osnaživanja?**

**Šta je konkretno učinjeno po preporukama Vijeća za djecu Federacije BiH, upućenim kantonalnoj i federalnoj razini vlasti, a koje se odnose na ugrožavanje dječijih prava, posebno sve izraženijem problemu nedostatka adekvatnog smještaja za djecu sa poremećajima u ponašanju koji zahtjevaju stalnu medicinsku skrb?**

**Da li su Uredu ombudsmena predočene informacije o eventualnom radu na otklanjanju nedostataka po preporukama od strane institucija i ustanova nakon izrade specijalnog izvještaja o stanju u ustanovama socijalne zaštite?**



**Da li je kroz rad institucija koje imaju nadležnost da zbrinjavaju osjetljive kategorije djece bez roditeljskog staranja ikada provedeno ozbiljno istraživanje o njihovoj percepciji onoga što im je potrebno a što im sistem pruža?**

**Koliko su žrtve nasilja u prilici biti zaštićene na osnovu novog Zakona o zaštiti od nasilja u porodici i nasilja prema ženama ako još uvijek, suprotno rokovima definisanim nakon donošenja zakona, nisu donijeti podzakonski akti?**

**Koliko sistem pruža podršku silovanim žemnama i da li je ova osjetljiva kategorija obuhvaćena mjerama podrške koje su osigurane kroz novi Zakon o zaštiti od nasilja u porodici i nasilja nad ženama?**

#### **ODGOVOR:**

U Ministarstvu za rad, socijalnu politiku, raseljena lica i izbjeglice Kantona Sarajevo zaprimljena je gore navedeno pitanje zastupnice Alme Kratina, a koje je sa pažnjom razmotreno u okviru ovoga ministarstva na koju dajemo slijedeće izjašnjenje, u dijelu koji se odnosi nadležnost Kantona, i informacije sa kojima raspolažemo:

Nadležnost u oblasti borbe protiv trgovine ljudima ima Ministarstvo sigurnosti Bosne i Hercegovine, a smještaj žrtava trgovine ljudima realizira se na osnovu na osnovu naloga tužilaštva i uz uključivanje JU „Kantonalni centar za socijalni rad“ kao organa starateljstva u okviru propisanih nadležnosti, kada se radi o maloljetnom djetetu. Ministarstvo sigurnosti BiH u okviru svog Budžeta planira grant sredstva za nevladine organizacije koje upravljaju skloništima za zaštitu i pomoć žrtvama trgovine ljudima u Bosni i Hercegovini (strane i domaće).

Kada su u pitanju djeca žrtve krivičnih djela, a koja imaju poremećaje u ponašanju, naglašavamo da Kanton Sarajevo nema specijalizirane ustanove za smještaj ove djece. Smještajni kapaciteti osigurani su za djecu bez roditeljskog staranja u KJU Dom za djecu bez roditeljskog staranja, SOS Dječija sela BiH i u hraniteljskim porodicama, za djecu u riziku i djecu počiniocima krivičnih djela u KJU „Odgojni centar Kantona Sarajevo“, a sve u zavisnosti od trenutnog zdravstvenog i socijalnog stanja djeteta. Djeca se nadalje, u zavisnosti od socio-zdravstvenog stanja, upućuju i u Ustanovu za socijalno zbrinjavanje, zdravstvenu njegu, odgoj i obrazovanje Pazarić, te Ustanovu za socijalno zbrinjavanje, odgoj i obrazovanje - Sarajevo. Djeca, žrtve nasilja u porodici, smještaju se u Sigurnu kuću koja egzistira u okviru Fondacije lokale demokratije. Osim navedenog, JU „Kantonalni centar za socijalni rad“, KJU „Porodično savjetovište“ i KJU „Odgojni centar Kantona Sarajevo“, kao i određene nevladine organizacije pružaju savjetodavne usluge i podršku djeci.

Tim za izradu i implementaciju Akcionog plana za prevenciju maloljetničkog prijestupništva i rad sa maloljetnicima u kontaktu sa pravosudnim sistemom u Kantonu Sarajevo od 2024 – 2028. godine putem Ministarstva za rad, socijalnu politiku, raseljena lica i izbjeglice Kantona Sarajevo uputio je konkretan prijedlog Vladi Kantona Sarajevo za rješavanje problema smještaja djece sa poremećajima u ponašanju.

Predstavnica Ministarstva za rad, socijalnu politiku, raseljena lica i izbjeglice Kantona Sarajevo je toku 2024. godine učestvovala u izradi dokumenta Program mjera za podršku mladima koji napuštaju sistem javne brige u okviru čega je provedeno istraživanje sa djecom i mladima smještenim u KJU Dom za djecu bez roditeljskog staranja, djecom i mladima smještenim u



hraniteljske porodice i djecom i mladima koji su izašli iz sistema javne brige. Fokus je bio na pripremu za proces osamostaljivanja, odnosno o njihovim potrebama u ovom procesu, sa posebnim akcentom na stambeno pitanje, zapošljavanje i podršku nakon izlaska iz sistema javne brige.

Što se tiče podzakonskih akata kao provedbenih akata po Zakonu o zaštiti od nasilja u porodici i nasilja prema ženama u Federaciji Bosne i Hercegovine ("Službene novine Federacije BiH", br. 19/25) nisu doneseni svi koji su propisani, a koje su u obavezi donijeti resorna federalna ministarstva.

U skladu sa odredbom člana 82. Zakona, do donošenja novih podzakonskih akata primjenjuju se postojeći podzakonski akti donesenim na osnovu ranijeg Zakona o zaštiti od nasilja u porodici ("Službene novine Federacije BiH", br. 20/13 i 75/21). To znači da sve nadležne institucije i dalje imaju obavezu postupati bez prekida, primjenjujući važeće procedure i mjere zaštite.

Što se tiče sistema zaštite žrtava nasilja u porodici u Kantonu Sarajevo on je unaprijeđen na način da se od 2022. godine u kontinuitetu provodi aktivnost "Zaštita žrtava nasilja u porodici" koji u fokusu ima žene žrtve nasilja koje su bile smještene u Sigurnoj kući, a za koje stručni radnici Javne ustanove "Kantonalni centar za socijalni rad" - nadležnih službi socijalne zaštite i stručno osoblje Sigurne kuće, na osnovu svoje ekspertize i iskustva u radu za ovom populacijom procijenili da im je potrebno pružiti podršku i po izlasku iz Sigurne kuće. Cilj ovih aktivnosti je osiguravanje smještaja za žene žrtve nasilja koje su prošle tretman u Sigurnoj kući i po izlasku iz iste su nastavile da samostalno žive i rade, a sve u cilju njihovog dodatnog osnaživanja na socijalnom, ekonomskom i psihološkom polju, te sprečavanja povratka nasilniku. Osim navedenog, JU „Služba za zapošljavanje Kantona Sarajevo“ također kontinuirano kreira različite programe podrške zapošljavanju žrtava nasilja u porodici u Sarajevskom kantonu.

Također, ističemo da je u Kantonu Sarajevo osigurana podrška silovanim ženama, i u prilog tome govori i činjenica da je u novembru 2025. godine potpisan Protokol o postupanju u slučajevima silovanja, prvi protokol takve vrste u Bosni i Hercegovini. Ovim dokumentom uspostavljen je institucionalni okvir zasnovan na multidisciplinarnom pristupu sa ciljem prevencije, pravovremenog otkrivanja, efikasnog procesuiranja, te pružanje stručne podrške i adekvatne zaštite žrtvama silovanja u Kantonu Sarajevo.

Pripremila: Smaragda Lučkin, šefica Odjeljenja  
Kontrolisao: Miralem Dedović, pomoćnik ministriće  
Amira Gackić, sekretarka Ministarstva

Dostavljeno:  
1. Naslovu,  
2. a/a.



**MINISTRICA**  
**Enda Pavić Pečenković**